



## RADIO ONDE FURLANE, DA QUARANT'ANS “MAI D'UNA RADIO”

ESCRICH DA MARCO STOLFO  
VIRAT EN OCCITAN DA ROSELLA PELLERINO

GRAFIA CLASSICA\*

Radio Onde Furlane al principi del 2020 a fach 40 ans. Tot es començat lo 2 de febrer del 1980, emè la constitucien d'la cooperativa Informazione Friulana, la societad editritz d'la

radio, e las premièras transmissiens. Despuèi aquel moment Onde Furlane continua a aver una foncien d'servici public (comunicacien e informacien en lenga furlana)

e a èsser un espaci d'libertat, un pòst per experimentar lengatges e un catalizator d'creativitat e partecipacien. La sia istòria principia quora comença a èsser butat en



discussien lo monopòli estatal en la radiofonia e televisien e naissen, en tot l'Estat italian, las radios libras. Es decò enclauraa en la situacion particulara del Friul de lhi ans Setanta, entre las mobilitacions contra las servituts militaras e per la creacion d'Universitat del Friul, lo terramòt del 1976 e lo principi d'la reconstruccion: pròpi da l'experiènça d'autogestien practicaa en las *tendòpolis e baracòpolis* e pr'aquò dal contròl dirèct sus aquel procés endralhat da las comunitats locals s'esvilopen novèlas importantas formas d'afermacion identitaria e de protagonisme social.

La cooperativa e la radio son lo resultat d'aquela situacion e sustot d'un percors que se desbana ental 1979, emè un grop de personas de diferenta extracion politica e culturala e diferentas generacions, que dividen la mesma visien del Friul e la volontat de crear un instrument de comunicacion e d'informacion libra, alternativa e en lenga furlana.

Onde Furlane es la radio que conta lo Friul e lo monde adobrant la lenga furlana, emè lhi noticiaris, lhi espacis quotidians d'aprofondiment des nòvas e las rubricas, e es la radio jove e alternativa, emè siei programas dediats a la musica de tuchi lhi genres e totas provenienças.

Decò ent'aqueste sector adobrar la lenga furlana es fundamental, pas mec per descriure las expressions



artisticas de lhi autres mas decò per exprimer la sia creativitat: dal Premi Friül ("Premio Friuli"), concors instituït per lo premier viatge ental 1984 per promòure la produccion artistica en furlan en difèrents sectors, a l'etiqueta discografica Musiche Furlane Fuarte ("Musica friulana forte"), que despuei lo 1999 a realizat mai de 50 discs, fins a Suns Europe, lo festival europèu des arts en lenga minoritaria (la sèsta edicion es prevista entre 22 d'avost e 19 de setembre). Si lo Barcelona fotbòl se presenta emè lo slogan "mes que un club" (mai d'un club), se pòl ben dir que Onde Furlane es "mai d'una radio". Lo testimòni siei premiers quarant'ans de vita e resença, entre enformacion, musica, passatemp, cultura, agregacion e mobilitacion per lo Friul e sia gent: per un Friul viu, ver, dinamic, plural,

conscient e que se sap butar en relacion positiva emè la resta del monde.

Per celebrar aqueste important aniversari son estaas programaas d'iniciativas, a la radio e en vir per lo Friul, e se valoriza aquel tresòr qu'es son arquivi, per exemple arproponent programas "d'antan" e emè la digitalizacion del material sonòr. Per n'en saupre de mai: [ww.radioondefurlane.eu](http://ww.radioondefurlane.eu) e [www.facebook.com/radioondefurlane](http://www.facebook.com/radioondefurlane).